



UNIVERSITÄTS-
BIBLIOTHEK
PADERBORN

Universitätsbibliothek Paderborn

Joannis Commirii E Societate Jesu Carminum Libri Tres

Commire, Jean

Lutetiæ Parisiorum, 1678

XIII. In Obitum Magni Turennii, Quem Gallorum de foederatis sequuta est
victoria.

urn:nbn:de:hbz:466:1-14818

Progenies magnæ non impar Julia matri,
 Atque triumphali nubere digna viro:
 Augustæ comes, & Delphini Julia custos,
 Virtutis merito conveniente gradu.
 Floribus æternis & cantibus inclyta vatam,
 Sed magis ingenio Julia clara suo:
 Heu! rapta ante diem crudelibus occubat umbris;
 Et cinis est, nuper quæ stupor orbis erat.
 Illius edoctus mortem quid plura requiras?
 Barbarus est, cui non cognita vita fuit.

XIII.

IN OBITUM MAGNI TURENNII;

Quem Gallorum de fœderatis sequuta est victoria.

POSTQUAM fulmineo Turennius occidit ictu,
 Nam telo haud poterat debiliore mori;
 Teutones exclamant: Nostra est victoria; Marti
 Nulla tuo ad palmas jam mora, Cæsar, erit.
 Franca simul vulsis invadunt agmina signis,
 Heu! ducis indigno funere fracta sui.
 Mira fides: viso redit hoste in pectora virtus;
 Majoresque animos fecit ad arma dolor.
 Saxonas ense metunt. Restagnans sanguine Rhenus
 Vandalico, rubris in mare currit aquis.
 Ipsa triumphali feretro victoria, plenâ
 Accumulat lauros, debita ferta, manu.
 Ingentique vocans manes clamore beatos:
 Sumite, ait, nostrâ munera digna fide.
 Tu, quantus fuerit Turennius, Austria, disce:
 Sufficit ad clades illius umbra tuas.